

Juni 15, 2019

www.awemainta.com

www.facebook.com/awemainta

noticia@awemainta.com

583-1400



AWEMainta

15
año

Antoni Gario

"Mi no a comete ningun acto inmoral cu ningun menor"



Benvinda de Sousa



Antoni Gario

TABATA diasabra mainta, cu autoridadnan hudicial a bay over na detene e conocido artista, Antoni Gario como sospechoso di a drumi cu menor di edad.

El a haya sosten legal tambe segun ley ta prescribe, den abogado mr. Benvinda de Sousa .

Abogado de Sousa cu ta representa Antoni Gario a informa cu su cliente ta desmenti y nenga e acusacion di tabatin relacion sexual cu un of mas mucha di 15 año.

Antoni Gario tin pleno confiansa cu investigacion lo aclarea tur cos y cu pronto e lo ta bek den libertad. Coincidencia of no, su yiu homber ta sintando castigo pa practicamente mesun delito na KIA.



We don't just say it ... We Guarantee it !!!

ASIS
INTERNATIONAL
Advancing Security Worldwide®

*Your security protection
partner since 1996*

Tel: 582-7252

Everyone deserves a safe place to work,
live and play.

= exact

Solutions for Finance, Manufacturing,
Wholesale Distribution, Professional
Services, HRM, CRM and BPM

Business Processes
Marketing, Sales and Service
Logistics & Supply Chain Management
Reporting & Compliance
Planning & Production
Finance & Accounting
Project Management

Supporting all
your business activities

Our goal is to understand and anticipate your business
requirements. It means that everything we do is
geared towards equipping you with solutions that
will help you succeed as markets evolve

VCC
International NV

Exact. And it all comes together. Tel: 583-7072 | info@vcc.int.com | www.vcc-int.com

Shete aña pa homber cu a bati swa te cu el a fayece



AUNKE cu Eric den Corte a persisti cu e slanan di cual su swa Orlando Tromp a fayece di dje, no ta causa door di su persona, Hues a hay'e culpabel di maltrato pisa, unda e victima e fayece después.

Eric su caso a keda trata dia 28 di juni ultimo y na final Fiscal a pidi un castigo di 5 aña incondicional.

E caso aki a tuma luga dia 26 di november, 2018. E señora di e victima a lanta y a constata cu su casa ta den e mesun posicion cu e anochi anterior y e tabata friu friu. El a bati alarma y paramediconan cu a yega na e sitio a constata cu el a fayece algun ora prome caba.

Durante interrogacion den Corte e acusado a keda insisti cu e problema cu su swa a tuma luga riba un diadomingo anochi ora cu el a caba di yega di casino cu algun familiar. Nan a discuti, y dado momento el a pusha y dal e swa cu tabata haci fastioso.

E acusado a yega algun dia prome for di Hulanda cu vakantie y e tabata kedando na e caso na Madiki Kavel. Y hustamente door di e problema aki, el a dicidi di bay keda otro caminda.

Tambe el a declara cu dialuna su swa tabata bon y hendenan por a mir'e riba caya. Hasta e ta bisa cu riba filmacion di un supermercado por mir'e ta cana bay na su auto riba dialuna.

Aparentemente, segun por a mira, e tabatin discusion cu un persona. Hasta t'asina, segun e acusado, cu e por a core duro cu su auto y brake di repente pa cual e por a dal su curpa duro den e stuurwiel y fractura e ribchinan.

Hues a mustre declaracion di su ruman muhe, kende ta pareha di Tromp, cu den su declaracion a bisa cu e discusion a tuma luga dialuna anochi. Hasta e acusado a bis'e pa no declara nada di esaki na Polis. E reaccion di Eric Maduro ta cu e tabata kier pa Polisnan haci nan mesun investigacion, p'esey el a pidi e ruman pa no bay den detayes di nan discusion, pasobra e sla di Orlando no tin di haber cu nan problema di diadomingo anochi. Pues e acusado ta bisa cu ta diadomingo anochi e hecho a tuma luga, mientras cu e casa di e victima ta papia di dialuna anochi.

Fiscal a bisa cu e lesionnan cu e victima a haya na su ribchi ta parce cu un hende a dal'e cu rudia of a sinta riba dje cu hopi forsa.

Hues diabierna mainta a bisa e acusado cu e ta haya legalmente proba cu el a dal e victima Orlando Tromp varios biaha cu mokete na cara y a pone rudia riba su curpa cu consecuencia cu el a sufri varios fractura di ribchinan, cualnan a afecta su pulmonnan.

Hues a bisa cu e no ta kere loke cu e acusado Eric Maduro a declara den Corte. E ta haya e declaracion contradictorio di loke e acusado a bisa na Polis. Asina el a declara cu su swa su cara tabata tur na sanger y tabatin problema cu hala rosea. E tabata kier a hib'e hospital, pero Orlando no tabata kier. Ruman di e acusado a bisa cu Orlando a haya hopi sla, tabata sangra y tabata sinti cu e kier a saca. E victima a bay drumi y no a duna señal di bida mas despues.

Hues a bisa cu Orlando a wordo maltrata door di su swa di tal manera cu el a keda cu 5 ribchi fractura cual a causa su morto.

Hues a tuma Maduro na malo cu el a presiona su ruman muhe pa no bisa nada di e pelea. Otro cos cu ta tum'e na malo cu e no ta acepta loke cu el a haci y ta mas preocupa pa su mes.

Tur esaki ta haci cu e ta haya cu e demanda di 5 aña di prizon ta poco y a subie na shete (7) aña.



EDITORIAL

Parlamento sin caracter y sin identificacion propio



Pa: Victor (Toko) Winklaar

Prome Minister Evelyn Wever Croes na momento di instalacion di su Gabinete, a priminti y sigura pueblo cu Parlamento di Aruba, lo haya su balor bek, cu e organo aki lo ehecuta su responsabilidad manera cu Constitucion ta determina esaki y cu su Gobierno lo wordo controla pa Parlamento manera esaki mester ta.

Esaki pa motibo cu Prome Minister tabata di opinion cu durante di Gobierno di AVP, Parlamento a perde su identidad, a perde su balor y practicamente tabata haci loke Gobierno tabata determina p'e haci y no tabatin control riba Gobierno.

E promesa aki el a haci na pueblo, el a haci na Gobierno di Reino y a priminti cu Parlamento y su Gobierno, lo hiba un gobernacion husto y sigur hopi transparente caminda pueblo su represenantenan lo ta independiente di Gobierno. Fuera di esaki na luna di januari di e aña aki, Prome Minister a dirigi un carta na Presidente di Parlamento den cual e ta bisa cu den cuadro di independisacion di Parlamento, su persona a lanta un comision cu ta carga e nomber di 'Commissie Versterking Democratisch Bestel,' pa fortifica adicional p'e proceso di independisacion di Parlamento di Aruba.

Prome Minister relaciona cu esaki, a pone dos persona di su ministerio, na disposicion di Parlamento den personanan di O. Thijssen y J. Semeleer, kendenan tin conocimiento amplio pa loke ta organisacion di Parlamento.

Sinembargo desaroyonan te cu awor den Parlamento ta muestra cu di e proceso aki nada ta tumando lugar, cu Parlamento ta keda baila na loke Gabinete Wever Croes ta determina y riba dje, ta Gobierno mes den varios ocasion, ta determina ki tipo y ki ora reunionnan ta wordo yama y hasta ta Ministernan mes ta traha preguntanan pa miembronan di e tres fraccionnan cu ta sostene Gobierno, tin cu haci na nan persona ora di un 'bijeenkomst.'

Sinembargo e falta di respet di e propio Gabinete Wever Croes pa duna Parlamento su balor real y adecuado, a ser confirma den varios decision di Gobierno y kisas esun mas serio t'e protocol cu Prome Minister y Minister di Finansa a firma na luna di november di 2018, den cual nan sigura Gobierno Hulandes, cu e ley di LAFT lo wordo acepta y aproba pa Parlamento y caminda practicamente a duna CFT reconocimiento legal prome cu Parlamento a sikiera ricibi e ley di LAFT aki.

E solo hecho cu despues cu e tres fraccionnan den Parlamento cu ta sostene Gobierno a dicidi di trece cambianan den e ley di LAFT cu Gobierno a presenta y ta pone CFT un banda, a pone cu Gobierno di Reino a bolbe duna Prome Minister un ultimatum, den cual e tin cu ordena su Parlamento pa cambia e ley aki p'asina CFT por bin un base legal y sigui cu control riba e maneho di finansa publico manera e protocol firma ta indica.

Fuera di e desaroyo aki cu ta confirma dor di e propio decision di Gabinete Wever Croes no ta respeta Parlamento, tin desaroyonan aki na Aruba mes cu ta muestra con Parlamento ta simplemente 'loop mee' segun Gobierno ta dicta y tin cu haci loke Consejo di Minister ta dicidi.

Tin e situacion cu Minister di Finansa, caminda na lugar cu Parlamento haci uzo di su supuesto independencia y actua realmente den su control riba e maneho controversial di Minister Armando Rudy Lampe, ta haya cu ta Consejo di Minister ta dicidi di yama e mandatario aki na ordo y supuestamente a kita Tra'i Merdia for di e Minister. Sinembargo aki Gobierno mes ta falta respet pa leynan cu Parlamento mes a aproba manera esun di 'intelling ministeries,' caminda legalmente Tra'i Merdia ta keda responsabilidad di Minister Lampe y tur loke Minister di Asunto Social dicidi riba e proyecto aki, na final di dia ta decision di Minister di Enseñans t'esun cu tin base legal.

Si kier mustre seriedad berdadero y muestra pueblo y principalmente e maestronan cu a tuma un decision cu por trece tranquilidad den enseñansa, Gobierno mester a manda un concepto di ley pa cambio di e ministerionan pa Parlamento aproba y haci e cambio aki legal.

Recientemente tambe tin e conocido caso di e 'incinerator,' caminda miembronan di Parlamento a wordo yama pa un 'bijeenkomst' dor di e propio Minister Otmar Oduber, kende e.o. preguntanan formula p'e propio Minister, p'asina supuestamente e muestra cu tin transparencia den e proyecto aki.

Sinembargo e ex Minister, ex Parlamentario y ex Presidente di Parlamento, Candelario (Booshi) Wever, a acudi na Corte a base di LAR existente, pa haya tur informacion necesario riba e proyecto aki cu su persona tambe ta sospecha cu tin maniobranan tumando lugar pa faborece cierto grupo of compania. Ta bin acerca cu e unico fraccion den oposicion AVP, basta tempo pasa a dirigi un serie di pregunta na Minister Otmar Oduber cu tampoco a wordo contesta y tampoco a ricibi copia di documentonan cu nan a solicita pa cu e proyecto aki, loke ta liña recta contra di e nificacion berdadero di e palabra transparencia.

Pues desaroyonan cu a mustrand cu Parlamento di Aruba ta carece di caracter, caminda no ta representa pueblo realmente y no tin identificacion propio y sigur no ta independiente di Gobierno.

Kisas e cambio mas grandi cu a tuma lugar den Parlamento, ta ora cu manera Prome Minister a priminti na instalacion di su Gobierno, cu mester cambia e logo nobo cu ex Presidente di Parlamento, Marisol Lopez Tromp a pone di e Shoco como simbolo nobo di e organo aki, y pone bek e escudo anterior y esey riba su mes ta bisa hopi caba di e independencia di Parlamento.

Tur caso penal di awor manda te pa october y november

DIABIERNA mainta Corte tabatin un lista largo di acusado cu mester a presenta dilanti mesa berde. Sinembargo como cu ta den reces, nan caso a wordo posponi y mayoria a wordo manda pa tratamento te cu luna di november. Entre esnan cu a presenta tabatin un caso di asesinato tambe.

Daphne Diana Valerie Simmons, a nenga di presenta pa scucha cu su caso ta pro forma. E ta wordo acusa di intento di homicidio dia 13 di april 2019, dor di hinca un persona cu un of mas cuchiu den cara y/of lomba.

E ta wordo acusa di a destrui un bijbel di e un persona riba e mes dia ey. Su caso a bay pa prome di november pa 11'or di mainta.

Rahjev Jeares Castro di 31 aña ta wordo acusa di exportacion di cocaina dia 18 di april 2019, ora cu a haye cu un cantidad grandi di droga. E no kier a compronde cu su caso no ta sigui diabierna sino te dia 27 di september pa 11.30 di mainta. Guardianan mester a push'e pa sake di sala.

Junior Joao Parra Acosta ta sigui dia 3 di october, pa 10'or di mainta. Su caso tambe tabata pro forma y a wordo acusa di a tene relacion sexual cu un persona menor di edad den e periodo di prome di april 2018 pa 19 di april 2019.

Elder Jose Bullones Pargas di 20 aña su caso a move pa prome di november 11.10. E acusacion contra dje ta intento di homicidio riba 16 di april 2019, dor di hinca un persona cu cuchiu den nek.

Sheppard Angernee Flandes, acusa di ladroncia di un UTV den e periodo di 20 pa 22 di april 2019, conhuntamente cu un otro of otro nan mester bolbe den Corte dia 14 di november awor.

E caso cu mas atencion a hala t'esun contra Aurelio Ignatio Dirksz, pa cual caso famia di e victima a acudi masalmente. E acusado di 54 aña ta ser acusa di a tuma bida di un persona dia 23 di april 2019, dor di choke y/of uza violencia pisa contra dje.

E victima tabata su pareha.

E caso ta sigui dia 1 di november pa 9.30. E yiu no por a evita su rabia y emocion, y tabata yora mescos cu demas famia.

Jaquan Deonte Bodden ta bolbe den Corte 25 di november pa 11.30, acusa di falsificacion di carchinan di banco y uzo di e carchinan ey y uzo di un pasaporte Mericano falso den e periodo di 16 te 21 di april 2019.

Paul Arthur Merveille ta wordo acusa di violacion di un persona menor di edad riba 24 di april 2019.



E caso ta sigui 8 di november pa 10.30 di mainta.

Esun cu tabata di bon diabierna mainta tabata Mario Giovanni Ireno Maduro. A acuse di posesion di un arma di candela y bala nan riba 25 di april 2019. Su abogado a haci un apelacion p'e por haya su libertad te ora cu e caso wordo trata.

Principalmente teniendo cuenta cu su intencion no tabata pa uza e arma, e ta un first-offender y el a caba di bira tata. Huez a splik'e bon cla pakico e ta lague liber diabierna, pero cu e mester bolbe dia 3 di october pa 10.30 di mainta ora cu su caso wordo trata.

Chines a haya mes tanto castigo cu su detencion

DIABIERNA mainta Ye Chue Su a haya su sentencia den Corte, relaciona cu e caso penal contra dje pa benta di droga durante un periodo di mas cu un año. Dia 28 di juni su caso a wordo trata

Dia 18 di november ultimo Polisnan cu tabata pasando banda di rotonde di Paradera, a haya un holo masha fuerte di marihuana y a bin descubri cu esaki ta bini di un edificio panort di caminda. A drenta e luga y despues di basta insistencia a haya permiso di e homber pa lista den e luga.

Asina a bin descubri cu no tabata trata manera Su a bisa cu e tabata simplemente huma un joint hunto cu un amigo. A haya un cantidad di marihuana hunto cu algun otro material mas cu ta indica cu enbes di huma so, e mester tabata bende tambe.

Den interrogacion el a bin admiti di ta bende droga pa un año y 4 luna caba. E ponencia di su Abogado cu e lis-tramento tabata ilegal pa motibo cu no tabata permiso di doño di e luga, esta mama di acusado, no a ser tuma. Hues a haya legalmente proba cu Ye Chue Su den e periodo di augustus 2017 y november 2018 a bende droga y tabatin esaki den su poder. E cantidad cu nan ta calcula ta basa riba e mesun acusado a declara na Polis.

Fiscal a pidi un castigo di 12 luna di cual 4 luna ta condicional y 3 año di prueba. Hues a bay di acuerdo cu e demanda aki loke ta nifica cu e luna aki el a cumpli e 8 lunanan cu e mester sinta.

E acusado aki ta pendiente ainda un otro caso, cu ta relaciona cu e suma di placa cu el a gana cu negoshi di droga. Esey ta bay wordo trata den luna di september.

Solucion di Maneho di Desperdicio di Aruba Garantisa por medio di ley



Minister di Desaroyo Teritorial Infraestructura y Medio Ambiente, Otmar Oduber ta informa comunidad di culminacion di e proceso di Request For Proposal (RFP) pa locual ta solucion pa maneho di desperdicio di Pais Aruba. Diahuebs 18 di juli tur compania participante lo mester entrega nan oferta pa locual ta e proceso di

RFP relaciona cu establecimiento di un Waste to Energy Facility na Aruba. Esencial pa indica den esaki ta cu Gobierno ta garantiza viabilidad di e Waste Energy Facility por medio di legislacion.

E proceso di maneho desperdicio na Aruba conoce un trayectoria largo unda den transcurso di añanan a crea un 'Milieuverordening' y awo ta implementa e 'Afvalstoffenverordening'.

E leynan aki ta percura pa e forma cu ta trata cu desperdicio ta tuma luga den manera responsabel teniendo bienestar general como punto di salida.

Relaciona cu esaki por indica cu pais Aruba como parti di Reino Hulandes tin e obligacion di mantene su mes na tratadonan internacional manera esun di Basel cu ta cardinal pa un maneho responsabel di desperdicio. E tratado di Basel ta regla e.o exportacion y importacion di desperdicio.

Mediante e proceso legislativo aki, Gobierno di Aruba ta garantiza tur participante un proceso integro, transparente y duradero pa locual ta un 'Waste to Energy Facility' pa nos Pais.

Sr Haime Croes, Director DIP:

Carta a sali pa propietario nan di edificio den ruina na final di caya San Nicolas

A duna nan 30 dia pa regla nan asuntonan

UN edificio di cual Gobierno a ricibi hopi critica riba dje ta di e edicio bandona na final di main-street San Nicolas. Director di DIP sr. Haime Croes ta splica di e pasonan cu Gobierno a tuma pa por yega na soluciona e situacion aki.

Meta

Manera comunidad por a tuma nota, Gobierno ta haciendo diferente esfuerso pa desaroya San Nicolas den e di dos 'stedelijk gebied' cual ta defini den ROP. Pa esey kier pa tin na disposicion, terenonan bandona cu ta forma peliger pa e imagen di San Nicolas y diferente aspecto. Banda di esaki, e edificio en cuestion tin mas di 10 aña para y no ta den construccion, cual no mag huridicamente, como consecuencia di esaki, permisonan di construccion ta wordo tuma aden.

Sr. Croes ta duna di conoce cu carta a bay pa e famianan en cuestion cu ta doño di e edificio informandonan cu den 30 dia e departamento mester sinta cu nan pa por yega na un solucion. E ruina di hotel ta construi tambe parcialmente riba tereno di Gobierno, cual no mag. Pues aworaki ta haci apelacion na famianan pa por favor sinta cu DIP pa por yega na soluciona e situacion aki.



Algo cu pa añanan largo ta un preocupacion pa e bisindario y cual no ta cuadra cu e imagen cu ta creando di San Nicolas.

Por ultimo, ta informa pueblo cu DIP ta ehecutando cu e maneho di control den cual ta pone atencion na cosnan cu no ta bayendo bon segun nos manehonan y leynan manera erpacht y natuurverordening, conhuntamente cu DNM y DOW. Pesey ta recorda comunidad pa haci uzo di e plataforma InfrAruba pa cualkier keho cu tin y pa raporta esakinan, pasobra e informacion aki ta sumamente importante pa e departamentonan por traha mas efectivamente, sr. Croes a termina bisando.

BO MESTER DI WASTE BUCKET RESIDENCIAL OF COMERCIAL?

ecotech **YAMA**

Mr. Bucket

594-3757
mrbucket@ecotech.aw

20 yrd Big Bucket 15 yrd Junior Bucket 10 yrd Small Bucket

Lider di fraccion di POR,
drs. Marisol Lopez-Tromp

Un fondo di caretera y infraestructura ta di vital importancia pa desaroyo di Aruba



Lider di fraccion di POR den Parlamento, drs. Marisol Lopez-Tromp na inicio di e luna aki a manda un carta pa Ministernan Otmar Oduber y Xiomara Maduro cu un serie di pregunta relaciona cu fondonan pa careteranan y infraestructura.

Den e carta aki e ta haci un serie di pregunta relaciona cu e dos areanan importante aki pa desaroyo di nos isla y ta indica cu lo ta di vital importancia pa bin cu un Wegen en Infrastructuur Fonds (WIF), manera a conoce den pasado na momento cu Lopez-Tromp tabata Minister di Infraestructura pa medio di cual a logra traha hopi caminda cada aña y cu lamentablemente a wordo para durante Gabinetenan Eman.

Consecuencia di esaki ta cu no tabatin un forma structura y eficiente pa por dedica n'e inversion di mantencion, renobacion y construccion di careteranan y su infraestructura. Lamentablemente hopi caretera a bay atras y nunca a dedica e fondonan necesario pa evita esaki.

Cu un Fondo di Caretera, WIF, pais Aruba por conta cu fondonan aproba y pre-determina cu ta wordo dedica specificamente pa caretera y infraestructura. Logrando esaki e instancianan concerni por traha na un forma

structural y segun un schedule riba e mantencion, renobacion y construccion di careteranan y nan infraestructura segun e necesidadnan di cada area.

Manera Lopez-Tromp ta bisa, e desaroyo di e parti aki ta hopi importante y ta forma parti integral di un desaroyo economico.

“Un desaroyo economico sin cu e bay pareu cu un desaroyo di nos careteranan y nos infraestructura no lo t'esun di mas optimal y lo por wordo afecta hopi liher. Ademá, Gabinete Wever-Croes su meta principal ta pa pone nos hendenan central y parti di dje tambe ta nos careteranan y infraestructura, ya cu e ta contribui hopi na mehora y eleva e calidad di bida di nos hendenan, sin laga afo e parti di salud, seguridad y nos medio ambiente”.

Teniendo na cuenta e puntonan aki, lider di fraccion di POR den Parlamento ta pidi Gobierno pa reinstitui e WIF logrando asina un suma fiho p'e inversionnan necesario wordo realisa.

Marisol Lopez-Tromp finalisando a recorda Ministernan Oduber y Maduro cu e ta en espera di e contestanan por escrito di e serie di preguntanan manda pa nan relaciona cu e temanan di caretera y infraestructura.

Ricibi AweMainta tur dia den bo Inbox

Registra awo!
Manda bo e-mail na
noticia@awemainta.com



Habitantenan di San Nicolas a haci denuncia cerca periodista Doncker

Ta construi sin cu ta pone borchí di kico proyecto ta bini



HABITANTENAN di San Nicolas cu ta preocupa a acerca e periodista Hilario Doncker, kende por medio di su Facebook ta expresa e preocupacion di e hendenan di San Nicolas. E biaha'ki e preocupacion cu el a ilustra riba su pagina di Facebook ta relaciona cu un proyecto den construcion, pero cu no tin ningun indicacion kico e ta.

Actualmente na e tereno cu ta patras di Bonaire Bar y e edificio di ex Surinam Club, trabaonan di construcion ta tumando luga. Tumando esey na cuenta e habitantenan cu ta biba den bisindario di e tereno ta rabia. Esaki pasobra Aurora Funeral Home ta laga traha un Crematorio, mei-mei, na unda nan ta biba. Sabiendo esey e habitantenan a dicidi di tene un accion di firma, pa cual tin basta sosten. Meta di e accion aki ta pa presenta esaki na e Minister cu ta encarga pa duna permiso basa riba Ley di Molestia. Den e caso aki ta trata di Minister Otmar Oduber.

E intencion ta cu pa medio di e accion aki, pone un paro na e trabaonan cu ta tumando luga. E ta bisa cu habitantenan cu ta biba cerca di ex Club Surinam, patras di e edificio ya menciona ta haciendo trabaonan di construcion, keto bay ta malcontento.

Y esey a keda expresa den un accion di firma unda a haya 150 firma. Di otro banda tin hende ta puntra nan mes si debi na loke ta construyendo ta baha e balor di nan cas. Mientrastanto a entrega e firmanan na cuater departamento di Gobierno.

Sinembargo, e ultimo informacion cu e periodista a haya for di e habitantenan ta cu cu e trabaonan preparativo cu ta haciendo ta pa construcion di un Funeraria y no pa un Crematorio. Tumando e ultimo punto menciona na cuenta, kisas ta asina cu no ta permiti di traha un Crematorio su so, pero esaki mester ta conecta cu un edificio cu ta fungi como Funeraria?

Si e ultimo punto ta e caso, esaki por nifica cu e firmanan di e accion di firma, lo tin validez numa, ora den un di dos instante ta bay traha e Crematorium?

Riba e punto si prome ta traha un Funeraria y despues ta traha un Crematorium, a yama e Aurora Funeral Home, pa haya claridad riba esaki, pero no a logra haya contacto. Mientrastanto e trabaonan ta sigui, riba Diasabra tambe.

En realidad e habitantenan tin varios motibo pa cual nan no ta favor di construcion di e luga pa kima restonan mortal di hende den e area unda nan ta biba.

Sigui na pagina 9>



**TIMESHARE
FOR SALE BY OWNER**



**UNIT # 304 - WEEK 32
1 BEDROOM DELUXE SUITE
SLEEPS 5 PEOPLE**

- 2 X QUEEN BEDS
(1 IN BEDROOM & 1 PULLOUT BED IN LIVING ROOM)
- KITCHENETTE
- 3RD FLOOR
(BALCONY VIEW OVERLOOKING THE RESORT)

PRICE: \$5,500

**INTERESTED PLEASE CALL 583-1400
DURING OFFICE HOURS**

2,000,000

SUMMER

POINT GIVEAWAY

JULY 1 TO AUGUST 31

Open daily 10am to 4am • J.E. Irausquin Blvd #47 • 583.5000 • casinoalhambra.com

Win your share of \$20,000 in points!

20 WINNERS EACH DAY

You can win up to \$100 in Points!

Swipe and play free once daily. Earn 100 Slot Points or 8 Table Credits and play again — up to 5X each day

See Players' Club for full rules. Points can be converted to Free Slot Play.



E motibonan ta lo siguiente

1. No ta permiti pa brinda servicio den un area residencial unda e tipo di luga aki ta causa molester pa esnan concerni.
2. No a cumpli cu e procedura unda, pa medio di informe poni den corantnan, cu tin intencion pa laga construi un Crematorium riba e tereno concerni, pa asina habitantenan tin e posibilidad pa por a presenta nan obhecionnan.
3. No ta conoci si e trabaonan ta ser haci sin cu tin permiso pa haci esaki.
4. Si den e caso si a duna permiso, dicon Minister Otmar Oduber no a percura pa e procedura menciona na punto 2, ser ehecuta.
5. Minister Oduber a bisa cu lo actua contra esnan cu ta actua contra e Ley di Molester. P'esey na Seroe Cristal a pone un paro na e cobamento di santo cu tabata tuma luga eyan. Si bao autorisacion di Minister a duna un permiso di construccion y un permiso basa riba Ley di Molester, dicon na un tereno cu ta na San Nicolas si ta duna e permisonan ya menciona, den un area unda e Crematorium tambe lo causa molester na e habitantenan. Bisando esey Minister no ta haya cu aki ta midi cu dos midi?

6. Ultimo informe cu e habitantenan ta dispone di dje, ta cu e tereno ta propiedad di Club Surinam. Si esey ta e caso dicon un Funeraria por haci uzo di esaki pa construccion.
7. Dicon cerca di e tereno concerni no a laga pone un borchu riba cua ta para kico ta traha na e sitio.

E periodista despues ta haci un comparacion di trabounan tumando luga patras di ex Club Surinam cu esnan tumando luga den caya grandi na San Nicolas.

Riba un di e potretan ta ilustra e proyecto di ex Uncle Louis Store, unda ta haciendo trabaonan di reconstruccion di e edificio pa ubica Directie Natuur en Milieu. Aki tin un borchu unda tin varios informacion cu ta toca e proyecto aki. Pues esaki ta haci manera e reglanan stipula.

E di dos y di tres potret ta toca e trabaonan preparativo cu ta tumando luga patras di e edificio di ex Club Surinam. Aki por mira bon cla, e ta bisa, cu no tin ningun borchu cu ta informa kico ta traha eyan, cua ta e compania di construccion, etc, etc. Y esaki ta un di e puntonan cu e habitantenan cu ta biba den e bisindario concerni ta malcontento cun'e.

Gregorio Wolff, ex sindicalista

Grito alo loco di Minister Xiomara Maduro, no tin placa, no ta di un Social Democrata

Bay mesa y dialoga

DEN prensa por sigui ultimo tempo, na Aruba, dos asunto cu ta concerni e clase trahador. Prome e reclamo pa indexering di sindicatonan den sector publico. Tambe e problema di subsidie pa trahadornan di fundacionnan den sector publico, según e ex sindicalista, Gregorio Wolff.

INDEXERING

E reclamo di sindicatonan ta na su lugar. Costo di bida a subi bastante dor di e medidanan cu Gobierno a tuma, pa laga nos bisa, pa rescata e finansa publico di Aruba. Esaki despues di un maneho desastroso di 8 aña dor di keda crea debe, no tuma medida, haciendo e problema financiero di Aruba mas grandi, pero manteniendo e inflacion abao.

Según Gregorio Wolff, tur trahador na Aruba mester reclama nan aumento di salario p'e subimento di costo di bida. E trahador no mester paga p'e malmaneho di politiconan.

E Ministro di Finansa a lansa un grito "a la Loco-Loco-Trump": **No tin placa!**

Sigur pa un Ministro di un partido Social-Democrata e grito ta for di sla.

Den e mundo di awendia su posicion mester tabata: Situacion financiero ta dificil, nos Gobierno ta haci su best pa drecha loke otronan a dañá, pero ban dialoga, boso lidernan sindical tambe por trece alternativanan y mi ta sigur, cu si cada banda tira awa den biña nos por haya otro.

Esaki ta posicion di un Social-Democrata, di Hende Grandi y di Hende Sabi, según Gregorio Wolff.

LUCHA SINDICAL DEN SECTOR PUBLICO DI 1985-1994

Na inicio di 1985 siendo no-lider sindical, Gregorio Wolff a bisa di a wordo acerca pa ta vocero di e sindicatonan SEPPA, SIMAR y STA, durante un periodo hopi dificil.



Refineria Lago a caba di será su portanan y nos tabata dilanti inicio di Status Aparte na 1986.

Un periodo cu hopi lucha sindical, diferente sorto di reunion, cu trahadornan, cu lidernan sindical, cu otro gremionan, cu gobernantenan, reunionnan di negociación.

Pero tambe accion, manifestacion y welganan. Mester menciona cu nos tabatin un bon plan di acción p'e Welga di Maart 1985, aki cu varios comision, cualnan a traha.

Na maart 1985, tabata e ultimo biaha na Aruba cu welgistanan a enfrenta RIOT-Police. Dianan di Lucha, hopi tensión y tambe nos a conoce traición.

Amargo, tabata e acuerdo cu nos mester a firma pa baha salario cu 7,75%, ya cu seramento di e refineria Lago a causa cu Gobierno a perde mas di 60% di su entradanan. Pero e bahamento di salario aki a yuda Gobierno y Aruba bin bek financieramente riba pia. Na final di 1985, Gregorio Wolff a wordo eligi como Presidente di SEPPA.

AHATA: Juni tabata un luna positivo den turismo



Aruba Hotel & Tourism Association (AHATA) ta acumula e cifranan di ocupacion y prijs di hotelnan tur luna, y pa luna di juni 2019 e CEO di AHATA, Tisa LaSorte a anuncia cu resultado di juni tabata mihor cu mei.

Na juni 2019 Aruba a experiencia un averahe di ocupacion di 82.9% cu ta mas halto cu e luna anterior y 3.2 punto mas cu juni 2018.

E balor averahe di cada kamer (ADR) ta 4.1% mas cu juni aña pasa, yegando \$232.96.

E RevPAR, cu t'e entrada averahe pa tur kamer disponibel, na juni 2019 tabata \$193.07 y esaki ta un aumento di 8.3% compara cu un aña pasa.

Si compara e prome 6 luna di 2019 cu e mesun temporada di 2018, ta nota cu ocupacion a baha un tiki, cu 0.2 punto, pa un averahe di 86.2%. ADR a crece cu 8% y RevPar a crece cu 7.8%. Aruba su turismo ta experienciando extra demanda pa cual motibo mayoria di hotel por cobra un tarifa mas halto, incluyendo den low season.

E cifranan di AHATA ta basa riba 17 hotel miembro: Amsterdam Manor Beach Resort, Barceló Aruba, Boardwalk Hotel, Brickell Bay Beach Club, Bucuti & Tara Beach Resort, Divi & Tamarijn All-Inclusive, Eagle Aruba Resort, Holiday Inn Resort Aruba, Hyatt Regency Aruba, Manchebo Beach Resort, Marriott Aruba & Stellaris Casino, The Mill Resort, Renaissance Aruba Resort, The Ritz-Carlton, RIU Palace, RIU Antillas y Talk of the Town Hotel.



Parlamentario Marlon Sneek

Minister Flip Flop Lampe tin cu bay pa elimina preocupacion grandi den enseñansa

Fraccion di AVP diamars ultimo a haci entrega di otro carta na Presidente di Parlamento, pa yama un reunion cu Minister di Enseñansa Rudy Lampe, ya cu e fraccion ta haya cu ta falta di respet total loke a tuma lugar algun dia anterior c'un grupo di maestronan cu a bin entrega caba un manifesto na Vice Presidente di Parlamento.

Lider di fraccion di AVP, Marlon Sneek a mostra cu e cos aki ta inacceptabel ya cu Vice Presidente di Parlamento, Allan Howell a priminti e grupo di trahadornan aki cu nan lo ricibi contesta riba nan preguntanan den dos dia di tempo, pero mientrastanto e dianan a pasa y Parlamento a bay cu reces y ningun contesta of reaccion e grupo di maestronan aki a ricibi manera priminti.

“Ta simplemente un falta di respet total pa un grupo di trahador den enseñansa a bin Parlamento y haci un peticion y Vice Presidente di Parlamento ta haci un promesa cu e no a cumpli cune.

E peticion di e maestronan aki ta mesun peticion cu fraccion di AVP a yega di haci caba un luna pasa caminda nos a pidi un reunion publico pa nos atende cu e situacion cu ta reinando den enseñansa.

Awor tur hende a yega vakantie di scol y e maestronan ta bibando den un incertidumbre ya cu ningun hende sa kico a bay pasa ora cu scol habri bek y nos por tende for di veld cu e.o. tin un scol pa basha abou na Santa Cruz, pues un cantidad di incertidumbre.

Nos ta lamenta cu Parlamento a keda keto, a bay den su reces anto esnan cu a bin protesta no a haya un contesta y mas c'un biaha Parlamento, basa riba puntonan hopi importante, por a scoge pa hala e reces un of dos dia mas atras p'asina atende y cumpli cu e preocupacionnan tin bou di e maestronan.

Awe nos por wak cu no a duna oido n'esaki y simplemente ta bay cu reces sin atende cu e peticion urgente cu a maestronan di scol a trece aki na Parlamento y p'e motibo aki tambe fraccion di AVP ta entrega e di tres carta riba mesun peticion aki pa un reunion publico p'asina e Minister bin duna cuenta riba kico e ta haciendo.

Locual e maestronan a trece dilanti den nan peticion y pa fraccion di AVP ta hopi serio.

Nos por mira cu e Minister di Enseñansa ta hunga rond di e cos, purba di hinca AVP aden entre otro bisando cu ta AVP a hinca tur cos den otro y cu nos kier baha Gobierno, pero tur hende a haya copia di e carta cu a wordo entrega den un manifesto y e manifesto ta papia palabra cla.

E hendenan aki kier pa Minister di Enseñansa baha bay, pa motibo cu e no ta sirbi ya cu e ta dañando enseñansa y e carta no ta papia di baha Gobierno, e carta no ta papia di Gabinete Wever Croes, pero e carta ta papia di sr. Armando Rudy Lampe, kende ta Minister di Enseñansa, kende den nan concepto no ta sirbi y cu e Minister tin cu bay.

E Minister ta purba di hunga un wega bisando cu loke nan kier ta baha Gobierno, no shonnan, nan no kier baha Gobierno, pero loke nan kier a p'e Minister aki bay, pasobra e no ta sirbi p'e trabou aki.

Ta imposibel cu cada decision cu Minister Lampe a tuma, e tin cu hala tras bek, pasobra cu e no tin sosten p'esakinan y el a bira Minister Flip Flop ya cu awe e ta links y mañan e ta rechts y esey ta inacceptabel, pasobra ta dañan e ta dañan enseñansa y nos no por acepta esaki, ya cu esaki ta nifica cu futuro di nos yiunan ta man di un hende kende no sa kico e ta haci y simplemente a bira un Minister Flip Flop.

Awe e ta bay cera HAVO langtrayect y pa su mañan a cambia di pensamiento, awe e ta bay cera Tra'i Merdia y mañan el a cambia di pensamento, awe e ta bisa SPO ta muda y mañan e ta bira bisa cu e no a muda mas.

Kiermen e no sa kico e ta haciendo y ta na su lugar p'e Minister tene e honor na su mes y bay, cobra su wachtgeld trankil na cas y laga e maestronan di scol na paz.

Fraccion di AVP ta spera cu pronto haya for di Presidente di Parlamento un contesta riba e carta cu nos a manda, ya cu nos tey y si yama e reunion aki mañan mes, mañan nos lo tey y cu nos por atende cu e asunto aki ya cu e tema aki ta importante y no por laga esaki drumi, pasobra ta trata di futuro nos yiunan,” lider di fraccion di AVP, Marlon Sneek a declara.

Prome siman di Good4theNeighborhood di Aruba Bank exitoso

Empresarionan hoben a comparti nan experiencia na e hobennan



E prome siman di Good4theNeighborhood (G4N) 2019 a termina, unda cu tur hoben a ricibi diferente informacion riba e tipico di entrepreneurship. Diferente invitado a presenta y comparti nan experiencia y expertisio como empresarionan hoben cu a logra tin nan propio negoshi. Cada un invitado a splica di su propio experiencia y con el a logra su metanan.

Aruba Bank su obhetivo primario di G4N building entrepreneurs ta pa duna hobennan e guia y e 'tools' pa asina nan tambe por bira doño di nan propio negoshi y sigui cultiva e comunidad di Aruba.

Na comienso a tene e programa di introduccion 2019 y Aruba Bank a splica e hobennan kico tur nan lo haya durante G4N 2019. A duna diferente richtlijn cu e hobennan por uza pa bin cu ideanan di negoshi. Nan a haci actividad pa conoce otro y forma e ekiponan. Y despues durante e siman nan a haya e diferente lecturanan. Nan a haya hopi tips cu nan por a splica di biaha pa e prome presentacion cu nan a haci na e huradonan.

A introduci e Business Model Canvas na e hobennan, kendenan a haci diferente pregrunta riba e topico aki. E gruponan mester a bin cu nan propio number di negoshi pa asina traha un plan cu tur informacion ricibi.

Nos ta contento di mira e interaccion entre e participantenan y entrepreneurs. E hobennan tabatin diferente idea, pero tambe tabata hopi creativo. Danki na tur empresarionan pa haci e prome siman di G4N un exito.

Parlamentario Alan Howell

SNBA ta para firme tras di e hotel pa San Nicolas



SIMAN PASA, Alan Howell como miembro di Fraccion di POR den Parlamento a reuni cu Presidente, Vice Presidente y miembronan di San Nicolas Business Association (SNBA).

E reunion tabata uno hopi ameno, fructifero y positivo durante cual a elabora y intercambia di opinion y idea riba diferente topico di interes pa e parti pariba di nos isla.



E tema mas importante riba agenda tabata e hotel pa San Nicolas, cual ta un proyecto hopi anhela pa añanan largo, y tur loke esaki ta significa pa pariba di brug, sin laga afo e 'spin-off effect' economico cu e lo trece cune. Entre otro, e lo yuda reduci e desempleo cu tin pariba di brug, cual ta entre esunnan mas halto na Aruba, lo trece movecion den caya na San Nicolas, crea trabou pa esnan cu ta traha pabou, pa keda cerca di nan cas logrando mas tempo pa comparti den famia y ta reduci gastonan di transporte.



Igualmente a atende riba diferente otro proyecto cu lo contribui na un desaroyo economico pa San Nicolas. Alan Howell ta expresa cu loke por bisa cu pleno siguridat ta cu SNBA ta para firme tras di e proyecto hotelero pa San Nicolas y nan ta pronostica cu esaki lo trece un cambio grandi den e desaroyo economico na San Nicolas den tur sentido. San Nicolas tin tur derecho di rebiba bek, San Nicolas tin tur derecho pa lo miho y San Nicolas merece 'the best', Alan Howell a conclui.

Parlamentario Arthur Dowers

Minister Armando Rudy Lampe mester ta honesto y acepta su fracaso cu su maneho



MIEMBRO di fraccion di AVP, drs. Arthur Dowers a reacciona riba declaracionnan haci pa Minister Armando Rudy Lampe, kende siman pasa a acusa Partido AVP di no a haci algo nunca pa ‘speciaal onderwijs’ y cu AVP a falta respet pa sector aki.

“Pa un homber asina bon educa, dr. Lampe mester por sa mihor cu 10 aña pasa cu mi persona tabata Minister di Enseñansa, Gobierno di AVP a introduci e sector di ‘speciaal onderwijs’ pa atende un situacion cu no tabata adecuado ora cu e hobennan aki tabata atende EPB.

Nan no tabata ricibi e atencion adecuado n’e skol aki y a lanta un un skol p’e grupo di hobennan aki y a traha un skol nobo caminda nan por ricibi e atencion y educacion adecuado p’asina nan ta haya un educacion segun nan capacidad y cu tabata algo hopi importante mes.

Ta bin acerca cu Minister Lampe tin varios partner den su Gobierno cu a forma parti di e proceso aki, kendenan a sostene e proyecto aki, kendenan tabata forma parti di e plan aki cu a yuda e hobennan aki den e forma cu tabata necesario.

Si Armando Rudy Lampe ta criticando e proceso aki e tin cu papia cu e coleganan di Gobierno aki, trata di haya informacionnan corecto prome cu e lansa cierto acusacion sin base y sin sentido.

Hecho ta keda cu Minister Lampe nunca ta sincero cu e grupo di maestronan den enseñansa ya cu den reunionnan cu el a yega di sostene cu maestronan y na cual mi persona tambe a asisti, el a elogia e plan di Gobierno di AVP, e.o. e curriculum ontwikkeling, bisando cu e ta ehecutando e plan aki.

Sinembargo den otro reunion sosteni cu e grupo aki, e ta bisa cu e lo introduci un curriculum nobo y cu e lo informa e grupo di esaki dentro di dos siman loke te dia di awe esaki no a sosode.

Un dia e ta elogia e hecho cu AVP a construi un skol nobo p’e hobennan aki, pero despues ta bin papia cu nos a perde respet pa speciaal onderwijs, pues completamente bruha y confirmando cu e no tin nocion di kico e tin cu haci cu enseñansa.

Ora cu Lampe papia cu e meta di AVP ta di baha Gobierno, pero aki tin cu mostra un declaracion di ex Prome Minister Nelson Oduber, kende den pasado a bisa cu cu ‘elf min een is nul’, pero den e caso aki cu salida di Lampe, e Gobierno aki ta sigui na bida.

AVP no tin interes di baha Gobierno, ya cu ta tres partido cu a dicidi di uni nan mes y haci loke nan kier contra pueblo y nan tin cu para responsabel p’e maneho cu nan ta hibandando y no bin conta storianan y insinua cu ta AVP kier crea problema.

Lampe ta responsabel p’e desaster cu e ta haciendo den enseñansa y ta mas cu claro cu no por permiti su persona sigui cu e destruccion aki, ya cu tanto interes di maestro-nan como interes di studiantenan ta den wega.

Si Consejo di Minister cu Armando Rudy Lampe mes ta forma parti di dje ta anuncia publicamente cu nan a kita Tra’i Merdia for di su persona, ta bisa hopi di su maneho cu e ta hibandando y sin duda tabata un motibo cla cu e mester saca su conclusion cu esaki, pero no bin hunga weganan sin sentido comosifuera cu AVP ta tras di e desaroyonan cu ta tumando lugar.

No tin confiansa den e sector di enseñansa den Rudy Lampe y e unico culpabel di tur loke ta pasando ta su persona mes y di su Gobierno cu a uni hunto pa goberna e pais, pero mas tanto ta gobernando pa nan grupo di privilegiado y ta pueblo tin cu husga nan ora cu e momento yega cu esaki tin cu sosode,” Parlamentario Arthur Dowers a declara.

Despues cu algun dia pasa, a firma p'e keda na cabez di WNC

Awor trahadonan WNC ta existi cabez di dictador Trudy Hassell

UN biaha mas, tin un situacion tenso den Warda nos Costa, unda mayoria di trahadonan ta bolbe existi cabez di nan hefe, Trudy Hassell, kende nan ta califica como un dictador. Siendo e mesun mayoria di trahadonan a haya nan mes forza di firma un carta, unda nan ta sostene Trudy Hassell pa keda como Hefe di WNC.

E malcontento aki ta relaciona atrobe pe forma cu Hassell ta trata su propio hendenan, pa no papia di e detenidonan mes. Pa demostra cu prueba, e trahadonan aki a firma un carta cu 30 punto, cu a ser manda pa Minister di Husticia y copia a bay pa nan sindicato SEPPA.


Hassell no tin ningun clase di respet pa su propio trahadonan, kendenan no mag di expresa nan opinion. Esun cu habri su boca, por spera medida contra su persona. Trudy Hassell ta percura pa hinca miedo

den nan, te ora cu e haya su Waterloo. Pasobra manera a ser bisa, cada ken tin su grado di tolerancia y prome cu sosode un desgracia, a dindi di notifica Minister di Husticia, Andin Bikker, pa tuma un decision cu e persona aki, cu e trahadonan no kier mira mas na WNC.

Nos ta ser bisa cu tur loke ta para den carta di 30 punto contra Trudy Hassell ta berdad. Ta cosnan cu e ta conoci pe den Cuerpo Policial tambe. No ta nada nobo. Minister Andin Bikker no sa kico pa haci cune, pasobra den Cuerpo Policial nan no kier mira Trudy Hassell mas.

Trudy Hassell no a funciona na Bureau Interne Diensten na aña 1993 pa 1995. Nan tabata cla pa core fo'i Appeldoorn na 2000.

Unabes na Aruba, a hay'e den un dinstauto, no ta patruyando, pero pa otro cos. E no a sirbi como politico, ora el a subi lista di Andin Bikker.



El a perhudica Democracia Real mas cu haci un bon. A core cune y djey el a ser manda Sint Maarten, unda tambe nan a core cune. Kico por haci cu un persona cu mas malo ta haci cu bon.

Palabra awor ta na Minister Andin Bikker, mirando e demanda di e trahadonan di WNC.

Un herido y detenido den accidente riba Green Corridor



DIABIERNA anochi alrededor di 9:30 a sosode un accidente riba Green Corridor algun meter pariba di e brug nobo. Chauffeur lo a perde control di su auto dal den e vangrai. E auto a kentel, e otro auto a dal pal'i luz y bolter.

Un persona a resulta herida y transporta cu ambulance pa Hospital. Polis a detene un chauffeur pa sospecho di a stuur bou influencia.

Un cos ta sigur, velocidad halto sigur ta causa di e accidente aki.

Historia real di nos lucha pa Status Aparte

29 Aña pasa MEP a percura pa saca e fecha di Independencia 1996 for di den Statuut

FUERA di e logronan historico di Referendum na maart 1977, e accionnan heroico durante Augustus Scur na 1977, e Conferencia di Mesa Rondo na maart 1983 y e realisacion di nos Status Aparte entrante 1 di januari 1986, dia 13 di juli tambe ta un fecha historico pa nos pais, ya cu riba e fecha aki nos ta recorda cu 29 aña pasa e fecha di Independencia 1996 a wordo gescrap for di den Statuut.

STATUS APARTE Y INDEPENDENCIA

Tabata na maart 1983 cu durante e Conferencia di Mesa Rondo a acepta e resolucion di Aruba pa haci uzo di su derecho di autodeterminacion dor di scoge pa Independencia, cu lo mester wordo realiza na aña 1996.

Como fase transitorio prome cu Independencia, Aruba a haya pa un periodo di 10 aña su Status Aparte entrante 1 di januari 1986. Alabes a ser acorda cu prome cu 1996, esta na 1994 lo wordo teni un conferencia di evaluacion entre Reino y Aruba pa eventualmente examina e fecha di Independencia di Aruba den luz di evolucionnan estatal entre e paisnan den Reino.

CLARIDAD ESTATAL

Na 1986 partido AVP a drenta Gobierno di pais Aruba. Durante nan gobernacion di 1986 pa 1988 nan no a haci nada riba tereno di structura estatal. Tabata e eleccion di januari 1989 cu a trece MEP den Gobierno y un di e metanan primordial tabata pa trece claridad riba tereno estatal.

Esaki tabata necesario pa diferente motibo: 1. E cadena hotelero Hyatt kier a mira claridad pa loke t'e fecha di 1996, prome cu nan sigui inverti den nan proyecto, 2. Nos pais tabatin debenan astronomico di garantianan hotelero (SACE) cu mester wordo paga, 3. Pensioenfondos di Hulanda tabata menaza di no fia placa na FCCA pa construi casnan social, 4. Ministerio di Defensa Hulandes no tabata kier a sigui inverti den e Mariniers Kazerne na Aruba. Tur esaki en bista di e menasa di e fecha di Independencia 1996 cu tabata colga riba cabes di Aruba.

GARANTIANAN DEN MAN COMUNIDAD

Ta p'esey mes Gabinete Oduber 1 den forma diligente a cuminsa cu e proceso pa haya e garantianan manera palabra den e Conferencia di Mesa Rondo na maart 1983, esta cooperacion cu Reino den un Man Comunidad riba e terenonan di asunto di desaroyo, cultura, educacion, husticia, relacionnan exterior y defensa.

Sin embargo Gobierno Hulandes no kier a honra e palabracion haci pa cu e garantianan priminti e tempo ey.

Den cuadro di transparencia politico, partido MEP a tene e tempo ey un reunion na ex-Bushiri Hotel, caminda lidernan di bario a duna mandato na partido pa sigui cu e proceso pa scrap e fecha di Independencia 1996 for di den Statuut.

FIRMAMENTO DI CONVENIO

Asina pues dia 13 di juli 1990, esta un dia manera awe



29 aña pasa, ex-Prome Ministro Nelson Oduber a firma hunto cu Ministro Ernst Hirsch Ballin un convenio, unda a scrap e fecha di Independencia 1996 for di den Statuut y Aruba ta mantene e derecho di auto-determinacion, esta cu nos pueblo ta dicidi ki dia nos lo kier bira independiente, via un Referendum, pero cu aprobacion tambe di 2/3 parti di Parlamento.

Esaki siguramente ta un logro historico, caminda den forma ordena ta determina e proceso na momento cu Aruba lo kier bira independiente un dia.

Finalmente na maart 1994 sr. Nelson Oduber como Ministro Presidente, sr. Rudy Croes como Ministro di Husticia y sr. Booshi Wever como Ministro Plenipotenciario na Hulanda a defende cu exito e cambio di Statuut na favor di Aruba.

TRAICION NA NOS STATUS APARTE

Ta di lamenta si cu AVP no tabatin ningun balor di e lucha cu a ser hiba den pasado pa logra nos Status Aparte ya cu den forma traicionero nan a bende nos pais dor di acepta "aanwijzing", KB, CAFT for di Hulanda na 2014/2015, esta nan a bende nos autonomia financiero plumando asina nos Status Aparte.

Tur esaki pa motibo di nan bagamunderianan y nan mane-ho descabeya hiba riba tereno di finansa publico y economia.

Partido MEP ta gradici su lider honorario Nelson Oduber p'e curashi desplega na 1990, esta pa scrap e fecha 1996 for di den Statuut y tambe na nos lider inmortal Betico Croes cu a planta e simia aki durante e Conferencia di Mesa Rondo na maart 1983. Pabien Aruba. Pabien cu continuacion di nos Status Aparte.

Publicacion di 'BaluArte' ta proyecta y aprecia algun di persona y organisacion

cu grandemente a aporta na arte y cultura di nos pais

RECIENTEMENTE Minister di Cultura, Xiomara Ruiz Maduro a presenta e buki conmemorativo 'BaluArte'. Pa prome bes Aruba tin un publicacion y na nos mes idioma Papiamentu cu a documenta un cantidad di 30 persona y/of organisacion cu a contribui considerablemente na desaroyo artistico y cultural di nos pais den e ultimo 65 añanan. Ademá 'BaluArte' ta duna un bista amplio di cantidad grandi di proyecto, obra, actividad, presentacion y publicacion cu a tuma lugar durante di transcurso di aña.

'BaluArte' ta contene historia di e pioneronan cultural manera Hubert 'Lio' Booi (q.e.p.d.), Marlene Lampe, nos mama di Cultura Bernadina Growell (q.e.p.d.), nos Tata di Cultura, 'Padu Lampe', Jossy Brokke Jr., Vale Croes (q.e.p.d.), Robert Jean D'or, Astrid Salazar, Diana Antonette, Maybelline Arends, Sharon Rose, Chencho Kelly, Rafaela Elizabeth, Tica Giel, Claudius Phillips, Joan Danies y Jhon Freddy Tobón Montoya.

Den e buki historico aki tambe a documenta historia di e organisacion, fundacion, instancia y gruponan cu a celebra un of mas lustro den añanan cu a transcuri y cu a duna un aporte grandi riba tereno artistico y cultural manera Fundacion Lanta Papiamentu, Stichting Arubaanse Muziekschool, Grupo Cultural Hubenil de Trupialen, Prins Bernard Cultuurfonds Caribisch Gebied, Cas di Cultura Aruba, Tele Aruba, Grupo di Betico, Pierewietje, Club di Movimiento, Fundacion Muchila Creativo y Scol di Arte.

Alabes BaluArte a dedica atencion na nos idioma Papiamentu y n'e Grupo di Corector di Papiamentu.

Minister Ruiz-Maduro a subraya cu cada un di e pioneronan cultural tabata di un contribucion importante y a duna un apoyo grandi na desaroyo riba tereno di arte y cultura na nos pais Aruba.

'BaluArte' ta documenta parti di nos herencia cultural y ta duna informacion interesante cu pa hopi di nos tabata desconoci. Ademá e publicacion ta un bunita buki pa medio di cua nos futuro generacion por cera



conoci cu algun di nos pioneronan cultural.

E mandatario ta felicita pueblo di Aruba cu su publicacion 'BaluArte'. Cada un di nos mester sinti nos orguyoso di nos patrimonio cultural y mester sigui reconoce nos baluartenan cultural. Pronto e publicacion BaluArte lo ta obtenibel riba mercado y lo informa na unda e ta obtenibel.

Aruba Excellence Foundation a organisa kids camp: 'Turista riba mi isla'

DURANTE e prome siman di vakantie, Aruba Excellence Foundation (A.E.F.) a organisa su di 4 edicion di Kids Camp: 'Turista riba mi isla'. Meta di e camp ta pa nos hobennan di 9 pa 12 aña siña den un forma interactivo mas di Aruba su historia, cultura, geologia, e importancia di e sector di turismo y e importancia di un servicio inolvidabel. Esaki ta pa fomenta aprecio den nos hobennan pa nos isla y interes p'e sector di turismo.

E muchanan a bishita varios organisacion manera: Parke Nacional Aruba, pa conoce mas di nos flora y fauna, Casa del Mar y Matthew's Beachside Restaurant pa siña y wak kico tur ta 'come y bebe' di e operations di un hotel y restaurant, Goshen Farm, pa conoce e arte di planta berdu-ra tipico di Aruba como tambe kico ta nifica e concepto di 'farm to table'.

E muchanan tambe a bishita Aruba Ports Authority y a haya splicacion di e importancia di e turismo crucero y nan a conoce waf di Oranjestad mas di serca.

Por medio di un 'walking tour' dor di centro di ciudad, a siña e muchanan mas tocante e edificionan monumental y historico di nos capital Oranjestad y nos a haci un bishita na Museo di Historia.

Parti di e programa tambe a encera un bishita extenso na San Nicolas, caminda cu a haci un 'mural art tour' y a splica e storia tras di diferente arte mural, a bishita, Museo di Industria y a traha bunita arte di driftwood na Cosecha San Nicolas.

Aruba Aloe Balm tambe a ricibi un bishita di e Kids Camp caminda cu a duna un splicacion di e plantacion di aloe como tambe un tour den e museo y fabrica..

Durante e camp e muchanan a haya diferente tayer interactivo e.o. pa siña mas di musica di brassband cu tayer di 'Asambeho' di Remigio Rasmijn, tayer culinario di Taki (Frank Kelly) caminda cu e muchanan a siña traha jam crioyo di mango, pinta free-style riba palet y siña tocante cierto mata den naturalesa cu por wordo usa pa prepara cuminda.

Tambe e muchanan a haya tayer di Plastic Beach Party pa siña un poco mas di reciclahe y separacion di plastic.

Por ultimo e muchanan a haya un tayer tocante motibonan pakiko un turista ta bishita nos isla, kico nan ta haci durante nan vakantie y e importancia pa duna un bon servicio cu Zjeito!.



E ultimo dia di camp a culmina cu un ceremonia di clausura pa tur mayor. E muchanan a haci un presentacion relaciona cu e diferente actividadnan cu un turista por haci durante nan vakantie na Aruba.

Na final a haci entrega di certificado na cada un di e muchanan cu awor ta un mini-embahador di nos dushi isla!

Nos lo bolbe ripiti e Kids Camp aki di 29 di juli te cu 2 di augustus. Cupo ta limita y nos tin algun lugara so ainda disponibel. Por registra direct via nos email info@acp.aw of tambe por yama na 280-2924 pa ricibi mas informacion.

Aruba Excellence Foundation a wordo institui dor di Aruba Tourism Authority na juni 2018 y t'e fundacion encarga pa e.o. ehecuta e Aruba Certification Program (A.C.P.) como tambe e programa di Happy Information Officers (H.I.O.). Meta principal di e fundacion ta pa sigi desaroya y implementa A.C.P. y H.I.O. como tambe otro programanan specialmente diseña pa certifica personanan cu ta traha den sector di servicio y hospitalidad p'asina percursa cu e nivel di servicio excelente di Aruba ya bon conoci, por keda riba un nivel halto.

Patricia Lacle contento cu e servicio di EcoTech

PATRICIA Lacle ta cliente di EcoTech pa mas di 20 aña y ta contento cu e servicio. E ta orguyoso di EcoTech, semper nan ta na ora y nan ta bay cu tur sushi maske cu pone un saco extra of rama.

Loke Patricia Lacle ta admira di EcoTech ta cu e trucknan semper ta limpi. Tur dialuna nan ta pasa puntual na cas di Famia Lacle y e no tin problema cu esey. E ta recorda cu un biaha nan no por a presenta riba e dia stipula, cu tabata dialuna anochi, pero e dia siguiente den oranan di mainta trempa oficina a yama su persona pidiendo disculpa di no a presenta pa motibo di fayonan di truck. Pero nan a pasa diamars anochi pa recoge e sushinan.



E ta conseha tur hende di EcoTech, pasobra e bari ta mas grandi, nan ta bay cu tur sushi poni pafo y semper ta puntual. “Nan ta na ora y si tin un problema, nan ta yama bo e siguiente dia bisando sorry cu

nan no a ‘make it’ y bin e siguiente dia,” el a bisa. Loke mas e gusta di EcoTech ta cu nan truck ta hopi limpi, e ta traha keto y anochi no ta tende ora nan ta yega. Tambe nan no tin e holor sushi ni tin desorde.

Time Out

Dialuna e motor den nos mundo di Ping Pong sr Rudy Raga ta conta kico tin y kico ta bay tin pa Ping Pong aki na Aruba. No perde!



Weganan internacional di volleyball, Aruba vs USAAI

FOR di diamars awor dia 16 di juli 2019 te cu diasabra 20 di juli 2019 Aruba lo bay disfruta di Weganan Internacional di Volleyball Femenino entre Aruba y USA Athletes International (USA AI) cu lo tuma lugar na Centro Deportivo Betico Croes (CDBC).

USA Athletes International (USA AI) ta un organisacion sin fin lucrativo cu ta ofrece e estudiante-atleta e oportunidad deportivo unda e atletanan por participa den e deporte cu nan ta gusta riba un nivel internacional y e oportunidad cultural unda nan ta siña conoce e cultura di otro paisnan.

Despues di nan aña escolar e estudiante-atleta tin e oportunidad pa forma parti di un seleccion di un deporte unda e estudiante/atleta lo biaha pa exterior cu e meta pa siña conoce un otro pais y hunga/competi den nan deporte.

Nan lema ta: *"Bringing the world's Athletes together through Sports and Education"*

Esaki lo ta di 3 biaha cu Aruba Volleyball Association ta host e team di USA AI cu ta forma pa atletanan hoben cu banda di nan programa cultural, social y educativo, nan lo practica y competi nan deporte di volleyball dor di enfrenta nos teamnan local.

E team USA Athletes International (USA AI) lo enfrenta e teamnan di Volleyball di Damas di Aruba cu lo ta Volleyball Positivo cu Coach Percy Phelipa; Gazelles Reunited cu Coach Igmara Ogenia; VENUM cu Coach Errol Yrausquin y CBN cu Coach Noralfa Eckmeyer.

E schedule pa e dianan di wega ta como lo siguiente:



(Esaki ta un potret di e ultimo seleccion di USA Athletes International (USA AI) cu a bishita Aruba)

Dia:

Diamars 16 di juli 2019: USA AI vs ARUBA

Diarazon 17 di juli 2019: USA AI vs VENUM

Diahuebs 18 di juli 2019: USA AI vs Volleyball Positivo

Diabierna 19 di juli 2019: USA AI vs Gazelles Reunited

Diasabra 20 di juli 2019: USA AI vs CBN Centro di Bario Noord.

Tur weganan ta programa pa cuminsa pa 7:30pm di anochi na Centro Deportivo Betico Croes.

Aruba Volleyball Association ta haci un invitacion na tur miembro di AVA, e gran fanaticada di volleyball y Aruba pa bin presencia e intercambio amistoso di volleyball entre USA Athletes International y Aruba.

Registra awo!

Manda bo e-mail na noticia@awemainta.com

Ricibi AWEMainta tur dia den bo inbox



www.awemainta.com



www.facebook.com/awemainta



583-1400



583-1444

Kelvin Silvania di Royal Power ta lansa un "No Hitter" contra Celebrities

CAMPEONATO HEINEKEN fast pitch dedica na dos baluarte Jacobo Jansen y Gilbert "Nando" Maduro a continua riba canchanan na Pos Chiquito. Den categoria AA e fuerte ekipo di Royal Power Tat Fat Home Depot a enfrenta Celebrities un ekipo cu a titular campeon den Aklas den 2018 y a promove pa AA. Sinembargo Royal Power a baha hopi duro y ta knock out Celebrities 15-0 tras di un No Hitter lansa pa Kelvin Silvania. Boxscore final Royal Power 15 careda, 12 hit, 3 error y ta laga 5 coreador na base. Celebrities 0 careda, 0 hit, 4 error y tambe ta laga 5 coreador den circulacion. Mihor bateadornan pa Royal Power ta Gregory "Pilin" Krosendijk 2-2 cu 2 careda anota, Edmar "Macho" Tromp 2-2 cu 2 careda anota mas 2 rbi incluyendo un doblete, Jomark Flanegin y Kenny Hart ambos di 3-2 cu 2 rbi y un doblete cada un, Kelvin Silvania, Jair Thompson y Leander Angela tur a bay di 2-1. Kelvin Silvania ta enfrenta 14 bateador tirando 33 bola y 33 strike pa un total di 66 lanzamiento y no ta permiti ningun careda tampoko hit ponchando 4 bateador y ta regala 4 base por bola seyando e victoria riba su nomber. Jeremy Geerman ta bay cas cu e derota lansando 98 lanzamiento permitiendole 15 careda di cual 13 ta limpi tras di 12 hit y ta regala 5 base por bola. Campeonato ta continua dialuna awor pa 8pm na Pos Chiquito unda Royal Power ta enfrenta Macuarima Spark Elektra cual ta muestra di ta bay ta un tremendo wega. Be there!!




Campeonato HEINEKEN fast pitch Aruba

Softball Bond a reparti premio

William Benitez MVP, Rachi Berry Champion Batter y Edgar Bautista Champion Pitcher

CAMPEONATO HEINEKEN fast pitch di Aruba Softball Bond dedica na dos baluarte a termina den categoria A-Klas. Piratas Bronx Birds ta derota Logros den e serie di best out of 5 pa asina reklama e titulo maximo esta Campeon di Aruba 2019. Aruba Softball Bond mesora despues di wega a bay over na entrega premio na tur esnan cu a destaca den categoria A-Klas. Ekiponan cada un a hunga 10 wega durante campeonato regular promer cu nan a drenta Play Off. Pues di campeonato regular a saca Champion Batter, Champion Homerun y Champion Pitcher mientras MVP a bin di e wega final unda alaves a entrega premio di Campeon y Sub Campeon. Pa por competi pa champion bateer un hungador mester tin minimo 23 plate appearance. Presidente di ASB Sr Endy Croes a yama dilanti Rachi Berry di e ekipo di Logros kende tabata tin 27 plate appearance mientras el a bay di 19-15 pa un averahe di 789 incluyendo 2 doblete y 5 homerun mas 11 careda impuha y asina conquista e titulo maximo como e batting Champ di campeonato di A-klas 2019. Rachi Berry di e ekipo Logros a bay cu un trofeo extra esta champion homerun cu 5 cuadrangular durante campeonato. Johnny Rasmijn a ricibi e trofeonan pa Rachi Berry kende no por tabata presente durante e wega final. Edgar Bautista di e ekipo di Logros ta conquista e premio di champion pitcher cu un record di 5 victoria y 1 derota y un ERA di 1.85 lansando 32.67 inning, enfrentando 146 bateador tirando 172 bola, 331 strike pa un total di 503 pitch y ta poncho 19 bateador permitiend 33 hit di cual un so tabata homerun, regalando 9 base por bola y ta golpia 6 bateador durante temporada. Mesora a bay over na yama William Benitez pitcher ganador den e wega final kende a wordo corona cu e premio maximo esta MVP di play off final. Pabien na Piratas cu su premio di Campeon y pabien Logros cu sub campeon, pabien tambe na tur cu a gana premio individual, Rachi Berry, Edgar Bautista y William Benitez. Aruba Softball Bond por mira atras riba un tremendo campeonato di A-Klas y e siman entrante lo continua cu categoria AA unda Royal Power y Macuarima lo midi forza dialuna anochi pa 8pm na Pos Chiquito.



Royal Aurora


Funeral Home & Crematory

The Lord is my shepherd; I shall not want.
He maketh me to lie down in green pastures:
he leadeth me beside the still waters.
He restoreth my soul: he leadeth me in the paths
of righteousness for his name's sake.
Psalm 23: 1-3

It is with deep sorrow we announce the passing of:

Teodor Fernando Patterson

*21-10-1945 - †11-07-2019



Former employee of:
Chicago Bridge & Company
Nederex
NAC
Dik & Doof

Left to mourn his loss are his:

Children :
Floyd Patterson
Annette Patterson
Jennifer & Eric Gumbs-Patterson
Sheine Patterson

Grandchildren:
Denzel Patterson
Amber Patterson
Delaine Patterson
Chanel Patterson

Mothers of his children:
†Dora Tarr
Maritza Poulino

Brothers:
†Julian Patterson
Recaldo Patterson
†Jose (Smiley) Hughes
Clement Hughes
Vincent Hughes

Sisters:
Eudine Patterson
Arlene Patterson
Lucrecia Hughes
Lucienne Hughes
Angela Stokes-Hughes

Goddaughter:
Jeritsa Montilla-Cremoney

Cousins, nieces and nephews too numerous to mention

Related to families:
Patterson, Gumbs, Hughes, Stokes, Hazel, Hodge, Nadal, Woods, Isei, St. Jago, de Miranda, Groen, Griese, Koeman, Eustace, Bayne, Haddocks, Brown, Buddy, Raphaëla, van Heyningen, Richardson, Rafael, Fenton, Tarr, Heyliger, Wilson.

Farewell service will be held Monday July 15, 2019 from 2 to 4 pm at Aurora Funeral Home followed by cremation service in family circle.

Royal Aurora

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

Nos ta anuncia fayecimento di:

Mirella Omira Tromp

Mihor conoci como: "Mouwy"
*28-03-1973 - †10-07-2019



Na number di su:
Compañero di bida y tata di su yiunan:
Douglas Garces Colina

Yiunan: Omayra y Melrick y yiunan
Dayen y yiu
Darrien y Maribel
Dajanira y Miguel Angel y yiunan

Nietonan: Giomar, Daynah, Jayrick, Lymaira, Mikaylee

Mama y tata: †Elizabeth Tromp y †Lionel Brenborg

Rumannan: Zoraida Tromp y yiunan
Mima Tromp y yiunan
†Junior Tromp
Marianela Tromp y yiunan
Jessica y Rufino Petroochi y yiunan
Bianca y yiunan
†Nathaly y yiu
Richard y yiunan
Carina y Curt Mc Hensi y yiunan
Judith y Julio Gross y yiunan
†Jairo Tromp y yiu

Welo y wela: †Jose Tromp y †Eliza Dirksz

Tanta grandi: Tantaura

Tanta y omonan: †Carmen Croes y yiunan
†Marianita Solognier y yiunan
†Calista Tromp y yiunan
Jossy Tromp y yiunan
†Brigida Montaner y yiunan
Fransisco y Gina y yiu
Aurita House y yiunan na Curacao
†Benny Tromp y Mena y yiunan

Sobrinu y sobrinanan: †Marlon Tromp, Zulaika Tromp y yiunan, Bryan y yiunan, Jeancarlo y yiunan, Eugene y yiunan, Kimberly na Hulanda, Marco y yiunan na Hulanda, Robertico y yiunan na Hulanda, Jonathan Lake y Mirayda Nadal y yiunan, Gregory Lake y Rosemary Everon y yiunan, Suheal Lake y Alfred Bernabela y yiunan, Sulina y Jesus Sanchez y yiu

Madrina: †Lidia Helder

Comer y compeman
Su bon amigo/a(nan), bon bisinanan muchu hopi pa menciona y demas famia

Nos disculpa si nos por a lubida cualkier famia den nos tristeza.

Danki na tur cu a yuda durante enfermedad na hospital y full piso 4, famianan na Venezuela, Hulanda y Corsow, na tur su amigonan di Stellaris Casino.

Acto di entierro lo wordo anuncia despues.

Royal Aurora

Funeral Home & Crematory

"Bo ta gusta hunga domino
Hunga bingo, bai casino
Wak baseball, Wak futbol
Tennis, wak Laura, wak tur cos cu drama
Sa cu semper bo lo ta cu nos
Momentonan trankilo mi lo scucha bo bos
Mi tabata sa cu un dia bo lo bai
Cu un dia bo lo no tey mas
Cu un dia na rudia mi lo cai
Y pidi Papa Dios no kibra mi cas"

Cu inmenso dolor na nos curason pero agradecido pa tur locual e la nifica pa nos, nos ta anuncia fayecimento di nos esposo, tata, abuelo, ruman, omo, bisinja, amigo y conocir

Ascencion Bonifacio Tromp

Cariñosamente yama:
" Chon Chon of Chon"
Ex trahado di Elmar
*14-05-1942 – † 10-07-2019



Na number di su Esposa:
Ana Rosa Delia Tatis Tromp

Yiunan:Randy, Damira Odor y yiunan
Elvis "Fenny"y yiunan
Jairzinho "Jair" y yiu
Mayra, Juni Semerel y yiunan

Hijastra/o: Clara Paulino y Federico Paulino

Rumannan: Jose "Turpin" Tromp y famia
Miano Tromp y famia
Jacintho "Chin" Tromp y famia
Juliana Gil y famia
Theresita Thode y famia
+Mariano Tromp y famia
+Eduardita Gil y famia
Clea Farro y famia
+Antonio Farro

Nieto/a nan: Björn, Nina, Liram, Radamhir, Dhyraen, Jacquiâime, Jeshua, Jacquiëlle, Jaimely, Jaxxden, Zoey y Hailey

Suegra y Suegro: Fedora Perez y +Rodrigo Antonio Tatis

Swa y Cuña nan: Miosotis Perez y Felix Fermin, Giovanni Tatis, Jonny Perez, Katia Sanchez, Wilson Tatis y +Rodrigo Tatis.

Amigonan di cas: Harold, Lou
Ex-coleganan nan di: ELMAR NV y Clean Up Cleaning Services
Famia, bisña y conociman di: Sabana Liber y Barcadera

Compañero/a nan di su teamnan: Noord Stars Domino Team, Baracuda Biljart Team, Free Zone Gang Team.

Su teamnan di futbol: Noord Central, Jong Aruba y Hooiberg Vets

Demas famianan: Tromp, Tatis, Odor, Semerel, Semeleer, Martina, Marti, Geerman, Gil, Thode, Farro, Solognier, Faro, Britten, Marapin, Pourier, De Palm, Jimenez, Croes, Ruiz, Zievinger, Gomez, Figaroa, Arends, Perez, Sanchez, Dijkhoff. Molero

Ta invita tur amigo, bisña y conociman pa asisti na e acto di entierro cu lo tuma lugar na Misa Santa Anna na Noord diamars 16 di juli 2019 di 2'or pa 4'or di atardi. Despues lo sali pa Santana Catolico na Sta Anna.
Condolencia lo tuma lugar na Aurora Funeral Home dialuna 15 di juli 2019 di 7'or pa 9'or di anochi.
Nos kier a pidi nos disculpa si den nos tristeza nos por a lubida un of otro famia.
Ta lamenta pero despues di entierro nos no ta ricibi bishita di condolencia na cas.

Royal Aurora

Funeral Home & Crematory

Cu dolor na nos curason pero hopi agradecido pa tur locual e la nifica y haci pa nos, nos ta anuncia cu a bay drumi den brasa di Señor:



Junior Fenelon

*20-09-1985 - †12-07-2019

Acto di entierio lo wordo anuncia despues.

Royal Aurora

Funeral Home & Crematory

Gradicimento y Invitacion

Pa medio di esaki famia kier a gradici tur esnan cu na un manera of otro a duna nos sosten, consuelo y forza durante e tempo dificil cu e fayecimento y entierio di nos defunto stima:



Anselmo Simeon Tromp

Boso muestra di atencion ta di hopi aprecio y un gran sosten pa nos. Un danki na un y tur cu a manda carchi, krans, whatsapp, email y a hasi yamada nan telefonico.

Tambe na Aurora Funeral Home pa cu su bon servicio y atencion. Boso muestra di atenshon tabata un gran Consuelo pa nos.

Na mes momento nos ta invita famia, bisiña-, amigo- y conociman pa compaña nos na 3 Santo Sacrificio di Misa na Kapel di Alto Vista diamars 16 di juli pa 5.30 pm, diaranson 17 y diabierna 19 di juli pa 6.30 pm

Boso presencia ta altamente aprecia.

*The peace of God,
which transcends all understanding,
will guard your hearts & minds.*

Philippians 4:7

Royal Aurora

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa tranquil,
Pa mi bolbe haña forza".
Salmo: 23

Nos ta anuncia fayecimento di:



Leoncio Teodulio Orman

*12-09-1932 - †12-07-2019

Acto di entierio lo wordo anuncia despues.

Royal Aurora

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa tranquil,
Pa mi bolbe haña forza".
Salmo: 23

Cu dolor na nos curason pero hopi agradecido pa tur locual e la nifica y haci pa nos, nos ta anuncia a bay drumi inesperadamente den brasa di Señor:



José Christino Hoek

Miho conoci como "Jo"
*13 april 1942 †12 juli 2019

Acto di entierio lo wordo anuncia despues

Royal Aurora

Funeral Home & Crematory

Cu tristesa pero contento pa loke el a nifica pa nos, nos ta anuncia fayecimento di:



**Carla Elvira
Arends - de Cuba**

11 maart 1933 – 11 juli 2019

Na number di su:

Yunan:

Gisela & Clifton Hollander – Arends
Quetika Arends
Contran Arends

Nietonan:

Melissa & Ricardo Roubicek – Hollander
Kristine Hollander & Terence Croes
Andreina & Nathan Ponson – van Romondt
Jolaine van Romondt
Talitha van Romondt
Clifton – John Hollander

Bisanietonan:

Vega, Brandon, Aliya, Alianni y Luna

Rumannan:

Lilia de Cuba
Edna Arends – de Cuba

Sobrino y sobrinanan

Su bon bisiñanan:

Marieta Wanapa & famia
Evelina Holman & famia

Su ayudantenan:

Elisa y Amparo

Ta invita pa asisti na e condolencia y acto di despedida cu ta tuma lugar na Royal Funeral Home dialuna 15 di juli 2019 di 2or pa 4or pm, despues ta sali pa Santana Catolico na Caya Ernesto Petronia na Playa

Despues di entierio, lamentablemente, nos no por ricibi bishita di condolencia na cas.

AWE Mainta
e corant di Toko

Tel: 583-1400 Fax: 583-1444

Den asesinato di Curasoleño a la ISIS na Hulanda

Con un muhé atractivo por a drenta cu un asesino burdugo



WILLEMSTAD. Den e teribel caso di asesinato stail di burdugo rayá di ISIS cu a tuma lugá e siman aki na Kerkrade caminda un condenado asesino Curasoleño di 52 año a còrta literalmente garganta di un dama Curasoleño tin comunidad di Kerkrade y gran parti di Hulanda malamente afectá cu un cos asina por a sosode.

E asesino ta un Curasoleño cu yama Robert H., di 52 año di cualnan ela pasa 20 bou di tutela di Husticia ulandes pa asesinato di otro Curasoleño na Rotterdam 20 año pasá.

E pregunta cu tur hende ta haciendo ta: con bin e burdugo por a cometé un asesinato mas cu asina tanto facilidad sin cu polis a interveni pasobra a atverti nan cu tin un burdugo ta persigui Reagan. Testigonan na Kerkrade a conta cu e dia dje siman aki cu ela mata Reagan, Robert a cumprá un cuchu grandi di còrta carni y den apenas algun minit cu e tabatin e cuchú, Robert a cumpli cu su palabra y a còrta garganta di Reagan.

Ela caba di haña retiro como cliente di hende cu tabata bou di observacion di husticia Hulandes pa e promé asesinato 20 año pasá.

E pregunta mas grandi cu tur hende tin: con husticia por a laga un tipo asina peligroso cana rònd te cu e por a drenta un supermercado di Albert Heyjn y cumpra e cuchu di mata baca. Logico cu e victima no tabatin ningun

sorto di defensa contra e asesino Curasoleño di Kerkrade.

Despues cu ela pasa su periodo di adolescente y a bira mayor di edad, e no tabatin miedo di nada.

Un dia na mei 1994 e Curasoleño Robert a pega pleita cu e Curasoleño Melvin di 24 año y a lòs un tiro den cabes. Melvin tabata biba na Alkmaar despues cu ela Sali Corsou pero ela muri den hospital.

Hues a condena e asesino na 7 año di castigo di prizon y un periodo di observacion hudicial indefini pasobra e ta un homber cu un mecha demaciado cortico y no tin nocion di control propio.

Sikiatronan a atverti husticia cu e homber por ripiti su hecho pasobra ela ela mata Melvin e tabatin apenas dos año den libertad.

Si 25 año pasá e no tabatin control riba su actonan, den e kwart siglo cu a pasa tampoco ela siña domina su furia pero sikiatronan sabi a haña cu despues di 20 año di tratamiento nan por laga e asesino sirculá den comunidad pasobra e no ta representá peliger.

UNDA NAN A TOPA

E dama di 42 año di edad, Reagan tambe ta Curasoleño y a topa e asesino den e clinica sikiatrico De Rooyse Wissel na Venray caminda ela bay bishita un famia.

E personal dje clinica te ainda ta den shock y ningun hende no por a reaccioná.

Promé cu nan a trata e asesino durante añanan largo den e clinica e tabata haña cuido den Oostvaarders-kliniek na Almere.

Te cu recientemente e tabata biba cu Reagan den cas como pareha pero ta constantemente mester a yama polis pe homber pa bringamento cu tabatin. Y dia cu reagan a pone Robert porta

pafó, e bòm a rementá den su serebro. Robert a mutilá Reagan mescos cu ela haci cu Melvin. Ora ela Sali for di cas mesora Robert a bula su tras pone cuchú na su garganta y a còrtá manera ta bisé cu nan a hiba plénchi. Asesinato di e dama curasoleño a cou-sa hopi pena pero tambe hopi rabia pasobra e dia anterior mes ela yama polis pasobra e tabatin miedo di baha bay den piso plano dje apartamento pe homber no sorprendé ey den.

Pero ora cu ela faya sali un rato Robert a bula riba dje manera un depredador salbahe.

E bisiñanan a furioso cu autoridadnan no a interveni siendo cu e asesino a yega di menasé.

Sea nan mester a duné proteccion of duné un 'safe house' pero e sistema a faya.

Tristes ta reyna den e caya pasobra tabata un muhé cu un curason di oro y tur mucha a batí yamé tanta y e tabata manera un mama pa tur bisiña cu tabata comprondé colebra cu nan riba nan problemanan.

Anto hustamente cu un persona asina algu asina por a pasa.

REACCION LALI-LALI

Minister Dekker di Proteccion Ciudadano no kier duna comentario pasobra e caso ta un investigacion penal y a polis cu fiscal ta atende esey.

E politico Gidi Marcuszower sí abatí franco den su opinion. "Ta parse cu ta conspiracion di asesinato tin den gabinete pasobra nan ta laga asesinonan cu haña tratamiento los riba hende den comunidad pa nan comporta manera mashin di mata hende". Y e reaccion mas estúpido cu polis a duna ta ora nan bosero a bisa cu nan ta investigando hasta ki grado e homber tabata molestiá Reagan pasobra ta mucho trempa pa determina esey.

E caso di Daniel de Pool:

Ela a violá su mes ruman muhé

WILLEMSTAD. E ciudadano Daniel de Pool di 34 aña di edad, diabierna porfin su caso a keda tratá den corte pa finalisá y awor únicamente mester warda e fecha 2 di augustus binidero pa hues mr. S.M. van Lieshout dicta sentencia. Na final di tratamento di e caso diabierna hues mr. S.M. van Lieshout a bisa abiertamente cu e mester di tempo pa studia e fail dici aki pa por yega na un conclusion final y e sentencia.

E caso aki riba su mes ta unu sumamente tristo y bergonsoso, principalmente pa e forma di proseder den corte di e propio Daniel de Pool.

Pa cuminsá ta un caso di violacion sexual di su propio ruman muhé parti di tata y ta un caso cu vários biaha tabata den sala di corte y cada biaha a para su tratamento, sea pa mas investigacion òf pa motibo di e hecho cu Daniel de Pool no kier a laga su abogado hiba palabra.

Den un di e biahanan ey, esta aña pasá, Daniel de Pool abiertamente a prohibí mr. G. Rellum pa papia na su nòmber y a bis'é stret cu e no kier e como abogado pa defendé su caso.

Mas despues ta asina cu cada biaha e tabata interumpí hues, interumpí fiscal y abogado pa duna un otro splicacion of interpretacion cu e tabata haña ta bon. Completamente otro interpretacion na ponencianan cu tabata bini padilanti Daniel de Pool tabatin.

Daniel de Pool, acusá di a 'rape' su



ruman muhé, a insistí cu tur loke a sosodé tabata a base di boluntad mutuo. Su ruman muhé mes tabata ke, Daniel de Pool a sigui bisa repetidamente cu insistencia den sala di corte.

FILMACION TA PRUEBA

Hues mr. S.M. van Lieshout y fiscal señora mr. Monique Dennaoui-Simon en cambio a disponé di filmacionnan di e actonan sexual pa demostrá cu e mucha muhé tabata drogá y tabata hasta fuera di su conosemento.

Daniel de Pool sinembargo a sigui bisa cu ta puru hungamento di comedia di parti di su ruman muhé (e víctima), kende na vários ocasion a sunchi e na su boca y di e manera ey a provok'é pa nan haci sèx.

E actitud di Daniel de Pool tabata pa haci como si fuera cu haci sèx y tene e tipo di relacionnan íntimo aki cu su propio ruman muhé no ta nada robes.

El a comentá cu nan a sinta bebe

biña, còmbersá cu otro como si fuera den un ambiente normal y cu nan relacion amoroso a cuminsá dos luna promé cu december 2017. Su ruman muhé tabata asina yalurs cu e tabata ke pa Daniel de Pool kibra e relacion cu e tabatin cu un otro mucha muhé, pero como cu esey no a sosodé, e ruman muhé a dicidi di drenta relacion cu un otro mucha hòmer cu yama Cesar. Masha remarcabel ta e forma habrí y sin ningun klase di reserva cu e tabata papia di su actonan sexual, e manera con el a comportá y cu su ruman en cambio tabatin hopi berguensa.

Hues a dirigí preguntanan skèrpi na Daniel de Pool, kende en realidad tabata papia sin ningun limitacion, pues sumamente habrí, enfatisando cu den nan situacion droga y alcohol tabata pará sentral, caminda tanto e como e victima tabata mal drogá y tabata haci loke nan tabata haci bou di influencia di e supstancianan mencioná.

Acusado de Pool mes tabata bruha tera pa su abogado

WILLEMSTAD. Tratamento di e caso contra Daniel de Pool diabierna a cuminsá mitar di 10 di mainta y mèrdia pa mitar di 1 ainda e caso tabata den full swing caminda cu insistencia cada biaha Daniel de Pool mes a sigui ta na palabra, strobando su abogado mr. Sheldry Osepa hiba un defensa un poco mas strukturá y consistente. Ratu, ratu Daniel de Pool tabata pretendé cu el a combèrti y cu ya e no ta usa droga mas y cu entre tanto el a scohe e caminda di Dios. Fiscal mr. Monique Dennaoui-Simon a repasá e acusacionnan, e manera con cosnan a bay den realidad, e cas caminda tur cos a sosodé, coremento den auto y e hecho cu e victima den un estado sumamente deprimí a dal cu cabes den glas di auto, dal e pasaheronan incluso Daniel de Pool algun cabisá.

Tambe e fiscal a para ketu na yamadanan telefónico cu a tuma lugá, demas personanan indirektamente envolví. E ruman muhé no tabata usa droga, solamente algun biaha el a yega di usa marihuana, segun fiscal Dennaoui-Simon.

E fail cargá cu informacion tabata consistí ademas di filmacionnan riba telefon cu si tabata nesesario lo a keda pasá den sala di corte diabierna, naturalmente sin prensa ni público presente, pasobra ta imágennan califiká hopi baho y sin moral cu lógicamente ta rekerí proteccion di e victima.

Sinembargo no a resultá nesesario pa pasa e imágennan mencioná



den sala di corte. Berdaderamente amplio e fiscal tabata na palabra pa ilustrá cu Daniel de Pool casi no conosé regla ni e mínimo na prinsipionan ético, ya cu suavemente bisá ta di un mònster ta trata aki cu a abuzá di su propio ruman muhé sexualmente.

Rapòrt di sikiater a concluí cu Daniel de Pool klaramente tin característicanan anti social, pero tòg e acusado por distinguí debidamente entre BON y MALU.

Un axidente di tráfico cu Daniel “Danny” de Pool a pasa aden anteriormente, segun expertonan a conducí na daño notabel den su serebro y tòg esakinan no tabatin nada di haber cu e violacion sexual di su propio ruman muhé.

No ta su ruman muhé so Daniel de Pool a violá, sino otro mucha muhé mas, pero cu brevemente fiscal a dedicá atencion na dje.

E suseso di violacion sexual di e ruman muhé ta dada di e fecha 30 di mart 2018 y cu tabata compañá cu menasa, agresion físico atraves

di moketa y slanan na curpa, den cara y na cabes di e victima, combiná cu ponemento di forsa brutu, pa culminá den penetracion y otro actonan sexual.

E ruman muhé aki despues di a keda violá, a bay haci denuncia na polis y e denuncia aki a pone cu investigacionnan a start mesora cu a conducí na detencion di Daniel de Pool.

Pero masha remarcabel ta e hecho cu cada biaha mas informacion tabata bini aserca di moda e preparacionnan pa e tratamento a sigui tuma tempo. Hues mr van Lieshout a bisa Daniel de Pool stret cu rapemento ta bay contra di ley y tene sèx siendo esun conserní ta fuera di su conosemento ta otro violacion flagrante di nos leynan.

Fiscal a declará cu sin duda un castigo pisá den e caso aki ta nesesario y a demandá un castigo di prizon di 8 aña, kitando e tempo cu e acusado a pasa den aresto preventivo. Hues mr. S.M van Lieshout a keda cu dia 2 di augustus pa mitar di 2 lo e dicta sentenci



AWEMainta

E unico corant GRATIS



Abona awo

Manda un e-mail na:

Noticia@awemainta.com

y skirbi e palabranan: *"Ami Kier Abona"*

Like nos riba facebook

Keda "up to date" y like nos riba facebook
www.facebook.com/awemainta



Subi riba nos website

www.awemainta.com

AWEMainta completamente

DIGITAL